

四庫全書

子部

欽定四庫全書

子部  
肘後備急方卷一

詳校官太醫院醫士臣舒岱

編修臣倉聖脈覆勘

總校官進士臣朱 鈐

校對官中書臣趙秉淵

謄錄監生臣孫承基

欽定四庫全書

子部五

肘後備急方

醫家類

提要

臣等謹案肘後備急方八卷晉葛洪原撰初  
名肘後卒救方梁陶弘景補其闕漏得一百  
一首為肘後百一方金楊用道又取唐慎微  
證類本草諸方附于肘後隨證之下為附廣  
肘後方洎元世祖至元間有烏某者得其本

于平鄉郭氏始刻而傳之段成已為之序稱  
葛陶二君共成此編而不及楊用道此本為  
明嘉靖中襄陽知府呂顥所刻始並列葛陶  
楊三序于卷首書中凡楊氏所增皆別題附  
方二字列之于後而葛陶二家之方則不加  
分析無可辨別案隋書經籍志葛洪肘後方  
六卷梁二卷陶弘景補闕肘後百一方九卷  
亡宋史藝文志止有葛書而無陶書是陶書

在隋已亡不應元時復出又陶書原目九卷  
而此本合楊用道所附祇有八卷篇帙多寡  
亦不相合疑此書本無百一方在內特後人  
取弘景原序冠之耳書凡分五十一類有方  
無論不用難得之藥簡要易明雖頗經後來  
增損而大旨精切猶未失稚川本意云乾隆  
四十六年九月恭校上

總纂官臣紀昀臣陸錫熊臣孫士毅

總校官 臣陸費墀

肘後備急方序

醫有方古也古以來著方書者無慮數十百家其方殆未可以數計篇帙浩瀚苟無良醫師安所適從况窮鄉遠地有病無醫有方無藥其不罹夭折者幾希丹陽葛稚川夷考古今醫家之說驗其方簡要易得鍼灸分寸易曉必可以救人於死者為肘後備急方使有病者得之雖無韓伯休家自有藥雖無封君達人可以為醫其以備急固宜華陽陶弘景曰葛之此製利世實多但行

之既久不無謬誤乃著百一方疏于備急之後訛者正之缺者補之附以炮製服食諸法纖悉備具仍區別內外他犯為三條可不費討尋開卷見病其以備急益宜葛陶二君世共知為有道之士於學無所不貫於術無所不通然猶積年僅成此編蓋一方一論已試而後錄之非徒採其簡易而已人能家置一帙遇病得方方必已病如歷卞和之肆舉皆美玉入伯樂之廐無非駿足可以易而忽之邪葛自序云人能起信可免天橫意



可見矣自天地大變此方湮沒幾絕間一存者閔以自  
寶是豈制方本意連帥烏侯夙多疹疾宦學之餘留心  
于醫藥前按察河南北道得此方於平鄉郭氏郭之婦  
翁得諸汴之掖庭變亂之際與身存亡未嘗輕以示人  
迨今而出焉天也侯命工刻之以趣其成唯恐病者見  
方之晚也雖然方之顯晦而人之生死休感係焉出自  
有時而隱痛惻怛如是其急者不忍人之心也有不忍  
人之心斯有不忍人之政矣則侯之仁斯民也豈直一

方書而已乎方之出乃吾仁心之發見者也因以序見  
命特書其始末以告夫未知者至元丙子季秋稷亭段  
成已題

欽定四庫全書

肘後備急方卷一

救卒中惡死方第一

晉 葛洪 撰

救卒死或先病痛或寢卧忽然而絕皆是中惡救用此方  
一方取葱黃心刺其鼻男左女右入七八寸若使目中  
血出佳扁鵲法同是後吹耳條中葛嘗言此云吹鼻  
故別為一法

又方令二人以衣壅口吹其兩耳極則易又可以筒吹之並捧其肩上側身遠之莫臨死人上

又方以葱葉刺耳耳中鼻中血出者莫恠無血難治有血是候時當捧兩手忽放之須臾死人自當舉手撈人言痛乃止男刺左鼻女刺右鼻中令入七八寸餘大效亦治自縊死與此扁鵲方同

又方以綿漬好酒中須臾置死人鼻中手按令汁入鼻中并持其手足莫令驚

又方視其上唇裏絃絃者有白如黍米大以針決去之  
又方以小便灌其面數迴即能語此扁鵲方法  
又方取阜英如大豆吹其兩鼻中嚏則氣通矣

又方灸其唇下宛宛中承漿穴十壯大效矣

又方割雄雞頸取血以塗其面乾復塗并以灰營死人  
一周

又方以管吹下部令數人互吹之氣通則活

又方破白犬以搗心上無白犬白鷄亦佳

又方取雄鴨就死人口上斷其頭以熱血瀝口中并以竹筒吹其下部極則易人氣通下即活

又方取牛馬糞尚濕者絞取汁灌其口中令入喉若口已禁者以物強發之若不可強者乃扣齒下若無新者以人溺解乾者絞取汁此扁鵲法

又方以繩圍其死人肘腕男左女右畢伸繩從背上大椎度以下又從此灸橫行各半繩此法三灸各三即起

又方令爪其病人人中取醒不者捲其手灸下大頭隨  
年

又方灸鼻人中三壯也

又方灸兩足大指爪甲聚毛中七壯此華佗法一云三  
七壯

又方灸臍中百壯也

扁鵲法又云斷狔尾取血飲之并縛狔以枕之死人須  
臾活

又云半夏末如大豆吹鼻中

又方搗女青屑重一錢七開口內喉中以水苦酒立活  
按此前救卒死四方并後尸蹶事並是魏大夫傳中正  
一真人所說扁鵲受長桑公子法尋此傳出世在葛後  
二十許年無容知見當是斯法久已在世故或言楚王  
或言趙王兼立語次第亦參差故也

又張仲景諸要方搗薤汁以灌鼻中

又方割丹雄鷄冠血管吹內鼻中



又方以鷄冠及血塗面上灰圍四邊立起

又方猪脂如鷄子大苦酒一升煮沸以灌喉中

又方大豆二七枚以鷄子白并酒和盡以吞之

救卒死而壯熱者礬石半斤水一斗半煮消以漬脚令

沒踝

救卒死而目閉者騎牛臨面搗薤汁灌之耳中吹皂莢

鼻中立效

救卒死而張目及吐舌者灸手足兩爪後十四壯了飲以

五毒諸膏散有巴豆者

救卒死而四支不收矢便者馬矢一升水三斗煮取二斗以洗之又取牛洞一升溫酒灌口中洞者稀糞也灸心下一寸臍上三寸臍下四寸各一百壯差

若救小兒卒死而吐利不知是何病者馬矢一九絞取汁以吞之無濕者水煮取汁

又有備急三物丸散及裴公膏並在後備急藥條中救卒死尤良亦可臨時合用之凡卒死中惡及尸魔皆天

地及人身自然陰陽之氣忽有乖離否隔上下不通偏竭所致故雖涉死境猶可治而生緣氣未都竭也當爾之時兼有鬼神於其間故亦可以符術而獲濟者

附方

扁鵲云中惡與卒死鬼擊亦相類已死者為治皆參用此方

搗菖蒲生根絞汁灌之立差尸蹙之病卒死脉猶動聽其耳中如微語聲股間暖是也亦此方治之

孫真人治卒死方以皂角末吹鼻中

救卒死尸蹙方第二

尸蹙之病卒死而脉猶動聽其耳中循循如嘯聲而股間暖是也耳中雖然嘯聲而脉動者故當以尸蹙救之方

以管吹其左耳中極三度復吹右耳三度活

又方搗乾菖蒲以一棗核大著其舌下

又方灸鼻人中七壯又灸陰囊下去下部一寸百壯若

婦人灸兩乳中間又云爪刺人中良久又針人中至齒立起

此亦全是魏大夫傳中扁鵲法即趙太子之患又張仲景云尸一蹙脉動而無氣氣閉不通故靜然而死也

以菖蒲屑內鼻兩孔中吹之令人以桂屑著舌下又以扁鵲法治楚王效

又方剔左角髮方二寸燒末以酒灌令入喉立起也

又方以繩圍其臂腕男左女右繩從大椎上度下行脊

上灸繩頭五十壯活此是扁鵲秘法

又方熨其兩脇下取竈中墨如彈丸漿水和飲之須臾  
三四以管吹耳中令三四人更互吹之又小管吹鼻  
孔梁上塵如豆著中吹之令入差

又方白馬尾二七莖白馬前脚目二枚合燒之以苦酒  
丸如小豆開口吞二丸須臾服一丸

又方針百會當鼻中入髮際五寸針入三分補之針足  
大指甲下肉側去甲三分又針足中指甲上各三分

大指之內去端韭葉又針手少陰銳骨之端各一分  
又方灸臙中穴二十八壯

救卒客忤死方第三

客忤者中惡之類也多於道間門外得之令人心腹絞  
痛脹滿氣衝心胸不即治亦殺人救之方

灸鼻人中三十壯令切鼻柱下也以水漬粳米取汁  
一二升飲之口已噤者以物強發之

又方搗墨水和服一錢七

又方以銅器若瓦器貯熱湯器著腹上轉冷者撤去衣器親肉大冷者易以熱湯取愈則止

又方以三重衣著腹上銅器著衣上稍稍少許茅於器中燒之茅盡益之勿頓多也取愈乃止

又方以繩橫度其人口以度其臍去四面各一處灸各三壯令四火俱起差

又方橫度口中折之令上頭著心下灸下頭五壯

又方眞丹方寸匕蜜三合和服口噤者折齒下之



扁鵲治忤有救卒符并服鹽湯法恐非庸世所能故不載而此病即今人所謂中惡者與卒死鬼擊亦相類為治皆參取而用之

已死者搗生菖蒲根絞取汁含之立差

卒忤停尸不能言者桔梗燒二枚末之服

又方末細辛桂分等內口中

又方鷄冠血和真珠丸如小豆內口中與三四枚差

若卒口噤不開者末生附子置管中吹內舌下即差矣

又方人血和真珠如梧桐子大二九折齒納喉中令下  
華佗卒中惡短氣欲死灸足兩拇指上甲後聚毛巾各  
十四壯即愈未差又灸十四壯前救卒死方三七壯已  
有其法

又張仲景諸要方麻黃四兩杏仁七十枚甘草一兩以  
水八升煮取三升分令咽之通治諸感忤

又方韭根一把烏梅二十箇茱萸半斤以水一斗煮之  
以病人櫛內中三沸櫛浮者生沉者死煮得三升與

飲之

又方桂一兩生薑三兩梔子十四枚豉五合搗以酒三升攪微煮之味出去滓頓服取差

飛尸走馬湯巴豆二枚杏仁二枚合綿纏椎令碎著熱湯二合中指捻令汁出便與飲之炊間頓下飲差小量之通治諸飛尸鬼擊

又有諸丸散並在備急藥中客者客也忤者犯也謂客氣犯人也此蓋惡氣治之多愈雖是氣來鬼鬼毒厲之

氣忽逢觸之其衰歇故不能如自然惡氣治之入身而  
侵尅藏府經絡差後猶宜更為治以消其餘勢不爾亟  
終為患令有時輒發

附方

外臺秘要治卒客忤停尸不能言細辛桂心等分內口  
中

又方燒桔梗二兩末米飲服仍吞麝香如大豆許佳

廣利方治卒中客忤垂死麝香一錢重研和醋二合服

之即差

治卒得鬼擊方第四

鬼擊之病得之無漸卒著如人刀刺狀脅腹內絞急  
切痛不可抑按或即吐血或鼻中出血或下血一名鬼  
排治之方

灸鼻下人中一壯立愈不差可加數壯

又方升麻獨活牡桂分等末酒服方寸匕立愈

又方灸臍下一寸三壯

又方灸臍上一寸七壯及兩踵白肉際取差

又方熟艾如鴨子大三枚水五升煮取二升頓服之

又方鹽一升水二升和攪飲之并以冷水噀之勿令即

得吐須臾吐即差

又方以粉一撮著水中攪飲之

又方以淳酒吹內兩鼻中

又方斷白犬一頭取熱犬血一升飲之

又方割鷄冠血以瀝口中令一咽仍破此鷄以搗心下

冷乃弃之於道邊得烏雞彌佳妙

又方牛子矢一升酒三升煮服之大牛亦可用之

又方刀鞘三寸燒末水飲之

又方燒鼠矢末服如黍米不能飲之以少水和內口中  
又有諸丸散並在備急藥條中今巫實見人忽有被鬼  
神所擺拂者或犯其行伍或遇相觸突或身神散弱或  
愆負所貽輕者因而獲免重者多見死亡猶如燕簡輩  
事非為虛也必應死亦不可要自不得不救爾

附方

古今錄驗療妖魅貓鬼病人不肯言鬼方鹿角屑搗散以水服方寸匕即言實也

治卒魘寐不寤方第五

卧忽不寤勿以火照火照之殺人但痛嚙其踵及足拇指甲際而多唾其面即活又治之方

末皂角管吹兩鼻中即起三四日猶可吹又以毛刺鼻孔中男左女右展轉進之



又方以蘆管吹兩耳并取病人髮二七莖作繩納鼻孔  
中割雄鷄冠取血以管吹入咽喉中大效

又方末竈下黃土管吹入鼻中末雄黃并桂吹鼻中並  
佳

又方取井底泥塗目畢令人垂頭於井中呼其姓名即  
便起也

又方取韭搗以汁吹鼻孔冬月可掘取根取汁灌於口  
中

又方以鹽湯飲之多少約在意

又方以其人置地利刀畫地從肩起男左女右令周面以刀鋒刺病人鼻令入一分急持勿動其人當鬼神語求哀乃問阿誰何故來當自乞去乃以指滅向所畫地當肩頭數寸令得去不可不具詰問之也

又方以瓦甌覆病人面上使人疾打破甌則寤

又方以牛蹄或馬蹄臨魘人上亦可治卒死青牛尤佳  
又方擣雄黃細篩管吹納兩鼻中桂亦佳

又方菖蒲末吹兩鼻中又末內舌下

又方以甌帶左索縛其肘後男左女右用餘梢急絞之  
又以麻縛脚乃詰問其故約勅解之令一人坐頭守  
一人於戶內呼病人姓名坐人應曰諾在便蘇

卒魘不覺灸足下大指聚毛中二十一壯

人喜魘及惡夢者取火死灰著履中合枕

又方帶雄黃男左女右

又方灸兩足大指上聚毛中灸二十壯

又方用真麝香一子於頭邊

又方以虎頭枕尤佳

辟魔寐方取雄黃如棗核繫左腋下令人終身不魔寐  
又方真赤燭方一尺以枕之

又方作犀角枕佳以青木香內枕中并帶

又方魔治卒魔寐久書此符於紙燒令黑以少水和之  
內死人口中懸鑑死者耳前打之喚死者名不過半

日即活

魘卧寐不寤者皆魂魄外遊為邪所執錄欲還未得所  
忌火照火照遂不復入而有燈光中魘者是本由明出  
但不反身中故耳

附方

千金方治鬼魘不悟阜莢末刀圭起死人

治卒中五尸方第六

五尸者

飛尸遁尸風尸沉尸尸注也今所載方兼治之

其狀腹痛脹急不得氣

息上衝心胸旁攻兩脇或礫塊涌起或攣引腰脊兼治

之方

灸乳後三寸十四壯男左女右不止更加壯數差

又方灸心下三寸六十壯

又方灸乳下一寸隨病左右多其壯數即差

又方以四指尖其痛處下灸指下際數壯令人痛上爪其鼻人中又爪其心下一寸多其壯取差

又方破鷄子白頓吞之口閉者內喉中搖頓令下立差  
又方破鷄子白吞七枚不可再服

又方理當陸根熬以囊貯更番熨之冷復易雖有五尸

之名其例皆相似而有小異者

飛尸者遊走皮膚洞穿藏府每發刺痛變作無

常也遁尸者附骨入肉攻鑿血脉每發不可得近見屍喪聞哀哭便作也風尸者注躍四肢不知痛之所在每發昏恍得風雪便作也沈尸者纏結藏府衝心脇每發絞切遇寒冷便作也尸注者舉身沈重精神錯雜常覺惛廢每節氣改變輒致大惡此一條別有治後藥也凡五尸即身中屍鬼接引

也共為病害經術甚有消滅之方而非世徒能用今復撰其經要以救其敝方

雄黃一兩大蒜一兩令相和似彈丸許內二合熱酒

中服之須臾差未差更作已有痢者常畜此藥也

又方乾薑桂分等末之鹽三指撮熬令青末合水服之即

差

又方搗蒺藜子蜜丸服如胡豆二九日三

又方粳米二升水六升煮一沸服之

又方猪肪八合銅器煎小沸投苦酒八合相和頓服即

差

又方掘地作小坎水滿中熟攪取汁服之



又方取屋上四角茅內銅器中以三尺布覆腹著器布  
上燒茅令熱隨痛追逐蹠下痒即差若瓦屋削取四  
角柱燒之亦得極大神良者也

又方桂一尺薑一兩巴豆三枚合搗末苦酒和如泥以  
傅尸處燥即差

又方烏臼根剉二升煮令濃去滓煎汁凡五升則入水  
一兩服五合至一升良

又方忍冬莖葉剉數斛煮令濃取汁煎之服如鷄子一

枚日二三服佳也

又方燒亂髮熬杏仁等分搗膏和丸之酒服桐子大三

丸日五六服

又方龍骨三分藜蘆二分巴豆一分搗和井花水服如

麻子大如法丸

又方漆葉暴乾搗末酒服之

又方鼈肝一具熟煮切食之令盡亦用蒜齏

又方斷鼈頭燒末水服可分為三度當吐如肉者不盡後

發更作

又方雄黃一分梔子十五枚芍藥一兩水三升煮取一升半分再服

又方梔子二七枚燒末服

又方乾薑附子各一兩桂二分巴豆三十枚去心並生用搗篩蜜和搗萬杵服二丸如小豆大此藥無所不治

又飛尸八腹刺痛死方凡犀角射罔五注丸並是好藥

別在大方中

治卒有物在皮中如蝦蟆宿昔下入腹中如桎不動搖掣痛不可堪過數日即煞人方

巴豆十四枚龍膽一兩半夏土瓜子各一兩桂一斤半合搗碎以兩布囊貯蒸熱更番以熨之亦可煮飲少少服之此本在雜治中病名曰陰尸得者多死

治尸注鬼注方第七

尸注鬼注病者葛云即是五尸之中尸注又挾諸鬼邪

為害也其病變動乃有三十六種至九十九種大略使人寒熱淋瀝怵怵默默不的知其所苦而無處不惡累年積月漸就頓滯以至於死死後復傳之旁人乃至滅門覺知此候者便宜急治之方

取桑樹白皮曝乾燒為灰得二斗許著甑中蒸令氣泆便下以釜中湯三四斗淋之又淋凡三度極濃止澄清取二斗以漬赤小豆二斗一宿曝乾乾復漬灰汁盡止乃濕蒸令熟以羊肉若鹿肉作羹進此豆飯

初食一升至二升取飽滿微者三四斗愈極者七八斗病去時體中自覺疼痒淫淫或若根本不拔重為之神驗也

又方桃仁五十枚破研以水煮取四升一服盡當吐吐病不盡三兩日更作若不吐非鬼注

又方杜蘅一兩莖一兩人參半兩許瓠子二七枚松蘿六銖赤小豆二七枚搗末散平旦溫服方寸匕晚當吐百種物若不盡後更服之也

又方獺肝一具陰乾搗末水服方寸匕日三一具未差  
更作姚云神良

又方朱砂雄黃各一兩鬼白茵草各半兩巴豆四十枚  
去心皮蜈蚣兩枚搗蜜和丸服如小豆不得下服二  
丸亦長將行之姚氏燒髮灰熬杏仁紫色分等搗加  
脂猪脂和酒服梧桐子大日三服差

又有華佗狸骨散龍牙散羊脂丸諸大藥等並在大方  
中及成帝所受淮南丸並療瘕易滅門女子小兒多注

金匱要略卷一  
車注船心悶亂頭痛吐有此疾者宜辟方

車前子車下李根皮石長生徐長卿各數兩分等麤搗作方囊貯半合繫衣帶及頭若注船下暴慄以和此共帶之又臨入船刻取此船自燒作屑以水服之

附方

子母秘錄治尸注燒亂髮如鷄子大為末水服之差

食醫心鏡主傳尸鬼氣咳嗽瘰癧注氣血氣不通日



漸羸瘦方桃仁一兩去皮尖杵碎以水一升半煮汁  
著米煮粥空心食之

治卒心痛方第八

治卒心痛桃白皮煮汁宜空腹服之

又方桂末若乾薑末二藥並可單用溫酒服方寸匕須  
火六七服差

又方驢矢絞取汁五六合及熱頓服立定

又方東引桃枝一把切以酒一升煎取半斤頓服大效

又方生油半合溫服差

又方黃連八兩以水七升煮取一升五合去滓溫服五

合每日三服

又方當戶以坐若男子病者令婦人用一杯水以飲之  
若婦人病者令男子用一杯水以飲之得新汲水尤  
佳又以蜜一分水二分飲之益良也

又方敗布裹鹽如彈丸燒令赤末以酒一盞服之

又方煮三沸湯一升以鹽一合攪飲之若無火作湯亦

可用水

又方閉氣忍之數十度并以手大指按心下宛宛中取  
愈

又方白艾成熟者三升以水三升煮取一升去滓頓服  
之若為客氣所中者當吐出蟲物

又方苦酒一杯鷄子一枚著中合攪飲之好酒亦可用  
又方取竈下熱灰篩去炭分以布囊貯令灼灼爾便更  
番以熨痛上冷更熬熱

又方蒸大豆若煮之以囊貯更番熨痛處冷復易之

又方切生薑若乾薑半升以水二升煮取一升去滓頓服

又方灸手中央長指端三壯

又方好桂削去皮搗篩溫酒服三方寸匕不差者須臾可六七服無桂者末乾薑佳

又方橫度病人口折之以度心厭下灸度頭三壯

又方畫地作五行字撮中央土以水一升攪飲之也

又方吳茱萸二升生薑四兩豉一升酒六升煮三升半  
分三服

又方人參桂心梔子擘甘草炙黃芩各一兩水六升煮  
取二升分三服奇效

又方桃仁七枚去皮尖熟研水合頓服良亦可治三十  
年患

又方附子二兩炮乾薑一兩搗蜜丸服四丸如梧子大  
日三

又方吳茱萸一兩半乾薑淮上桂心一兩白朮二兩人參橘皮椒去閉口及子汗甘草炙黃芩當歸桔梗各一兩附子一兩半炮搗篩蜜和為丸如梧子大日三稍加至十九十五丸酒飲下飯前食後任意效驗

又方桂心八兩水四升煮取一升分三服

又方苦參三兩苦酒升半煮取八合分再服亦可用水無煮者生亦可用

又方龍膽四兩酒三升煮取一升半頓服

又方吳茱萸五合桂一兩酒二升半煎取一升分二服  
效

又方吳茱萸二升生薑四兩豉一升酒六升煮取二升  
半分爲三服

又方白鷄一頭治之如食法水三升煮取二升去鷄煎  
汁取六合內苦酒六合入真珠一錢復煎取六合內  
末麝香如大豆二枚頓服之

又方桂心當歸各一兩梔子十四枚搗爲散酒服方寸

七日三五服亦治久心病發作有時節者也

又方桂心二兩烏頭一兩搗篩蜜和為丸一服如梧子大三丸漸加之

暴得心腹痛如刺方苦參龍膽各二兩升麻梔子各三兩苦酒五升煮取二升分二服當大吐乃差

治心疝發作有時激痛難忍方真射干吳茱萸分等搗末蜜和丸如麻子服二丸日三服勿喫熟食

又方灸心鳩尾下一寸名巨闕及左右一寸並百壯又



與物度頸及度脊如之令正相對也凡灸六處

治久患常痛不能飲食頭中疼重方烏頭六分椒六分

乾薑四分搗末蜜丸酒飲服如大豆四九稍加之

又方半夏五分細辛五分乾薑二分人參三分附子一

分搗末苦酒和丸如梧子大酒服五九日三服

治心下牽急懊痛方桂三兩生薑三兩枳實五枚水五

升煮取三升分三服亦可加朮二兩膠飴半斤

治心肺傷動冷痛方桂心二兩猪腎二枚水八升煮取

三升分三服

又方附子二兩乾薑一兩蜜丸服四丸如梧子大日三服

治心痺心痛方蜀椒一兩熬令黃末之以狗心血丸之如梧子服五丸日五服

治心下堅痛大如椀邊如旋梓名為氣分飲水所結方枳實七枚炙朮三兩水一斗煮取三升分為三服當稍軟也

若心下百結積來去痛者方吳茱萸末一升真射蔘如  
彈丸一枚合搗以鷄子白和丸丸如小豆大服二丸  
即差

治心痛多唾似有蟲方取六畜心生切作十四臠刀蹤  
橫各割之以真丹一兩粉內割中旦悉吞之入雄黃  
麝香佳

飢而心痛者名曰飢疝龍膽附子黃連分等搗篩服一  
錢七日三度服之

附方

藥性論主心痛中惡或連腰臍者

鹽如鷄子大青布裏燒赤內酒中頓服當吐惡物

拾遺序延胡索止心痛末之酒服

聖惠方治久心痛時發不定多吐清水不下飲食以雄

黃二兩好醋二升慢火煎成膏用乾蒸餅丸如梧桐

子大每服七丸薑湯下

又方治九種心痛妨悶用桂心一分為末以酒一大盞

煎至半盞去滓稍熱服立效

又方治寒疝心痛四肢逆冷全不飲食用桂心二兩為散不計時候熱酒調下一錢匕

外臺秘要治卒心痛乾薑為末水飲調下一錢

又方治心痛當歸為末酒服方寸匕

又必效治蝟心痛熊膽如大豆和水服大效

又方取鰻鱧魚淡炙令熟與患人食一二枚永差飽食  
彌佳

經驗方治四十年心痛不差黍米淘汁溫服隨多少

經驗後方治心痛薑黃一兩桂枝三兩為末醋湯下一

錢七

簡要濟衆治九種心痛及腹脇積聚滯氣筒子乾漆二兩搗碎炒煙出細研醋煮麵糊和丸如梧桐子大每服五丸至七丸熱酒下醋湯亦得無時服

姚和衆治卒心痛郁李仁三七枚爛嚼以新汲水下之飲溫湯尤妙須臾痛止却煎薄鹽湯熱呷之

兵部手集治心痛不可忍十年五年者隨手效以小蒜  
醎醋煮頓服之取飽不用著鹽

治卒腹痛方第九

治卒腹痛方書舌上作風字又畫紙上作兩蜈蚣相交  
吞之

又方搗桂末服三寸七苦酒人參上好乾薑亦佳

又方粳米二升以水六升煮二七沸飲之

又方食鹽一大把多飲水送之忽當吐即差

又方掘土作小坎水滿坎中熟攪取汁飲之

又方令人騎其腹溺臍中

又方米粉二升水二升和飲

又方使病人伏卧一人跨上兩手抄舉其腹令病人自縱重輕舉抄之令去床三尺許便放之如此二七度止拈取其脊骨皮深取痛引之從龜尾至頂乃止未愈更為之

又方令卧枕高一尺許挂膝使腹皮蹶氣入胃令人抓



其臍上三寸便愈能乾咽吞氣數十遍者彌佳此方亦治心痛此即伏氣

治卒得諸疝小腹及陰中相引痛如絞自汗出欲死方搗沙參末篩服方寸匕立差

此本在雜治中謂之寒疝亦名陰疝此治不差可服諸利丸下之作走馬湯亦佳

治寒疝腹痛飲食下唯不覺其流行方椒二合乾薑四兩水四升煮取二升去滓內飴一斤又煎取半分再

服數服之

又方半夏一升桂八兩生薑一升水六升煮取二升分  
為三服

治寒疝來去每發絞痛方吳茱萸三兩生薑四兩豉二  
合酒四升煮取二升分為二服

又方附子一枚椒二百粒乾薑半兩半夏十枚大棗三  
十枚粳米一升水七升煮米熟去滓一服一升令盡  
又方肉桂一斤吳茱萸半升水五升煮取一升半分再

服

又方牡蠣甘草桂各二兩水五升煮取一升半再服

又方宿烏鷄一頭治如食法生地黃七斤合細剉之著甑中蔽蒸銅器承須取汁清旦服至日晡令盡其間當下諸寒癖訖作白粥漸食之久疝者下三劑

附方

博濟方治冷熱氣不和不思飲食或腹痛疔刺山梔子川烏頭等分生搗為末以酒糊丸如梧桐子大每服

十五丸炒生薑湯下如小腸氣痛炒茴香蔥酒任下  
二十九

經驗方治元藏氣發久冷腹痛虛瀉

應急大效玉粉丹生硫黃五兩青鹽一兩已上滾細研  
以蒸餅為丸如菉豆大每服五丸熱酒空心服以食  
壓之

子母秘錄治小腹疼青黑或亦不能喘苦參一兩醋一  
升半煎八合分二服

聖惠方治寒疝小腹及陰中相引痛自汗出以丹參一兩杵為散每服熱酒調下二錢匕佳

治心腹俱痛方第十

治心腹俱脹痛短氣欲死或已絕方取梔子十四枚豉七合以水二升先煮豉取一升二合絞去滓內梔子更煎取八合又絞去滓服半升不愈者盡服之

又方浣小衣飲其汁一二升即愈

又方桂二兩切以水一升二合煮取八合去滓頓服無

桂者著乾薑亦佳

又方烏梅二七枚以水五升煮一沸內大錢二七枚煮得二升半強人可頓服羸人可分為再服當下便愈  
又方萊菔二兩生薑四兩豉三合酒四升煮取二升分為三服即差

又方乾薑一兩巴豆二兩搗蜜丸一服如小豆一丸當吐下差

治心腹相連常脹痛方狼毒二兩附子半兩搗篩蜜丸

如梧子大日一服一九二日二九三日後服三九再  
一九至六日服三九自一至三以常服即差

又方吳茱萸一合乾薑四分附子細辛人參各二分搗  
篩蜜丸如梧子大服五丸日三服

凡心腹痛若非中惡霍亂則是皆宿結冷熱所為今此  
方可採以救急差後要作諸大治以消其根源也

### 附方

梅師方治心腹脹堅痛悶不安雖未吐下欲死以鹽五

合水一升煎令消頓服自吐下食出即定不吐更服  
孫真人方治心腹俱痛以布裹椒薄注上火熨令椒汗  
出良

十全方心脾痛以高良薑細剉炒杵末米飲調下一錢  
七立止

治卒心腹煩滿方第十一

治卒心腹煩滿又胸脇痛欲死方以熱湯令灼灼爾漬  
手足復易秘方



又方青布方寸鹿角三分亂髮灰一錢匕以水二升煮  
令得一升五合去滓盡服之

又方劉薏苡根濃煮取汁服三升

又方取比輪錢二十枚水五升煮取三沸日三服

又方搗香菜汁服一二升水煮乾薑亦佳

又方即用前心痛梔子豉湯法差

又方黃芩一兩杏仁二十枚牡蠣一兩水三升煮取一  
升頓服

治厥逆煩滿常欲嘔方小草桂細辛乾薑椒各二兩附  
子二兩炮搗蜜和丸服如桐子大四丸

治卒吐逆方灸乳下一寸七壯即愈

又方灸兩手大拇指內邊爪後第一文頭各一壯又灸  
兩手中央長指爪下一壯愈

此本雜治中其病亦是痰壅霍亂之例兼宜依霍亂條  
法治之人卒在此上條患者亦少皆因他病兼之耳或  
從傷寒未復或從霍亂吐下後虛燥或是勞損服諸補

藥痞滿或觸寒熱邪氣或食飲挾毒或服藥失度並宜各循其本源為治不得專用此法也

附方

千金方治心腹脹短氣以草豆蔻一兩去皮為末以木瓜生薑湯下半錢

斗門方治男子女人久患氣脹心悶飲食不得因食不調冷熱相擊致令心腹脹滿方厚朴火上炙令乾又蘸薑汁炙直待焦黑為度搗篩如麴以陳米飲調下


二錢七日三服良亦治反胃止瀉甚妙

經驗方治食氣遍身黃腫氣喘食不得心胸滿悶

不蛀皂角去皮子塗好醋炙令焦為末一錢七巴豆  
七枚去油膜二件以淡醋及研好墨為丸如麻子大  
每服三丸食後陳橘皮湯下日三服隔一日增一丸  
以利為度如常服消酒食

梅師方治腹滿不能服藥煨生薑綿裹內下部中冷即  
易之

聖惠方治肺藏壅熱煩悶新百合四兩蜜半薑和蒸令  
軟時時含一棗大嚥津



肘後備急方卷一

欽定四庫全書

子部  
肘後備急方卷二

詳校官太醫院醫士臣舒岱

編修臣倉聖脈覆勘

總校官進士臣朱 銓

校對官中書臣趙秉淵

謄錄監生臣孫承基

欽定四庫全書

肘後備急方卷二

晉 葛洪 撰

治卒霍亂諸急方第十二

凡所以得霍亂者多起飲食或飲食生冷雜物以肥膩酒醢而當風履濕薄衣露坐或夜卧失覆之所致

初得之便務令煖以炭火布其所卧下大熱減之又並蒸被絮若衣絮自苞冷易熱者亦可燒地令熱水



沃敷薄布席卧其上厚覆之亦可作灼灼爾熱湯著  
甕中漬足令至膝并銅器貯湯以著腹上衣藉之冷  
復易亦可以熨斗貯火著腹上如此而不淨者便急  
灸之但明案次第莫為亂灸須有其病乃隨病灸之  
未有病莫預灸灸之雖未即愈要萬不復死矣莫以  
灸不即愈而止灸霍亂艾丸苦不大壯數亦不多本方  
言七壯為可四五十無不便火下得活服舊方用理  
中丸及厚朴大豆豉通脉半夏湯先輩所用藥皆難

得今但疏良灸之法及單行數方用之有效不減於  
貴藥已死未久者猶可灸餘藥乃或難備而理中丸  
四順厚朴諸湯不可不預合每向秋月常買自隨  
卒得霍亂先腹痛者灸臍上十四壯名太倉在心厭下  
四寸更度之

先洞下者灸臍邊一寸男左女右十四壯甚者至三十  
四十壯名大腸募洞者宜瀉

先吐者灸心下一寸十四壯又并治下痢不止上氣灸

五十壯名巨闕正心厭尖頭下一寸是也

先手足逆冷者灸兩足內踝上一尖骨是也兩足各七壯不愈加數名三陰交在內踝尖上三寸是也

轉筋者灸蹶心當拇指大聚筋上六七壯名涌泉又灸足大指下約中一壯神驗

又方灸大指上爪甲際七壯

轉筋入腹痛者令四人捉手足灸臍左二寸十四壯股中大筋上去陰一寸

若腕者灸手腕第一約理中七壯名心主當中指

下利不止者灸足大指本節內側寸白肉際左右各七壯名大都

乾嘔者灸手腕後三寸兩筋間是左右各七壯名間使若正厥嘔絕灸之便通

小品方起死

吐且下利者灸兩乳連黑外近腹白肉際各七壯亦可至二七壯

若吐止而利不止者灸臍一夫納中七壯又云臍下一

寸二七壯

若煩悶湊滿者灸心厭下三寸七壯名胃管

又方以鹽內臍中上灸二七壯

若遶臍痛急者灸臍下三寸三七壯名關元良

治霍亂神秘起死灸法以物橫度病人人中屈之從心

鳩尾飛度以下灸先灸中央畢更橫灸左右也又灸

脊上以物圍令正當心厭又夾脊左右一寸各七壯

是腹背各灸三處也

華佗治霍亂已死上屋喚魂又以諸治皆至而猶不差者

捧病人腹臥之伸臂對以繩度兩頭肘尖頭依繩下夾背脊大骨穴中去脊各一寸灸之百壯不治者可灸肘椎已試數百人皆灸畢即起坐佗以此術傳子孫代代皆祕之

右此前並是灸法

治霍亂心腹脹痛煩滿短氣未得吐下方

鹽二升以水五升煮取二升頓服得吐愈

又方生薑若乾薑一二斤呋咀以水六升煮三沸頓服  
若不即愈更可作無新藥煮滓亦得

又方飲好苦酒三升小老羸者可飲一二升

又方溫酒一二升以蠟如彈丸一枚置酒中消乃飲無  
蠟以鹽二方寸匕代亦得

又方桂屑半升以煖飲二升和之盡服之

又方濃煮竹葉湯五六升令灼已轉筋處

又方取楠若樟木大如掌者削之以水三升煮三沸去滓令灼之也

又方服乾薑屑三方寸匕

又方取蓼若葉細切二升水五升煮三沸頓服之煮乾蘇若生蘇汁即亦佳

又方小蒜一升咬咀以水三升煮取一升頓服之

又方以煖湯漬小蒜五升許取汁服之亦可



又方以人血合丹服如梧子大二九

又方生薑一斤切以水七升煮取二升分為三服

又方取賣解家机上垢如雞子大溫酒服之差

又方飲竹瀝少許亦差

又方乾薑二兩甘草二兩附子一兩水三升煮取一升

內猪膽一合相和分為三服

又方蘆蓬茸一大把濃煮飲二升差

若轉筋方燒鐵令赤以灼踵白肉際上近後當縱鐵以

隨足為留停令成瘡兩足皆爾須臾間熱入腹不復轉筋便愈可脫刀燒蝦尾用之即差

又方煮苦酒三沸以摩之合少粉尤佳以絮胎縛當從膝下至足

又方燒梔子二七枚研末服之

又方桂半夏等分末方寸匕水一升和服之差

又方生大豆屑酒和服方寸匕

又方燒蜈蚣膏傅之即差

若轉筋入腸中如欲轉者

取鷄矢白一寸水六合煮三沸頓服之勿令病者知之

又方苦酒煮衣絮絮中令溫從轉筋處裏之

又方燒編薦索三撮仍酒服之即差

又方釜底黑末酒服之差

若腹中已轉筋者

當倒擔病人頭在下勿使及地腹中平乃止

若兩臂脚及胸脇轉筋

取鹽一升半水一斗煮令熱灼灼爾漬手足在胸脇者湯洗之轉筋入腹中倒擔病人令頭在下腹中平乃止若極者手引陰陰縮必死猶在倒擔之可活耳若注痢不止而轉筋入腹欲死

生薑一兩累擘破以酒升半煮令三四沸頓服之差治霍亂吐下後心腹煩滿方

梔子十四枚水三升煮取二升內豉七合煮取一升

頓服之嘔者加橘皮二兩若煩悶加豉一升甘草一兩蜜一升增水二升分為三服

治霍亂煩躁卧不安穩方

葱白二十莖大棗二十枚水三升煮取二升頓服之治霍亂吐下後大渴多飲則煞人方

以黃米五升水一斗煮之令得三升清澄稍稍飲之莫飲餘物也

崔氏云理中丸方

甘草二兩乾薑人參白朮各一兩搗下篩蜜丸如彈丸覺不住更服一枚須臾不差仍溫湯一斗以麋肉內湯中服之頻頻三五度令差亦可用酒服

四順湯治吐下腹乾嘔手足冷不止

乾薑甘草人參附子各二兩水六升煮取三升半分爲三服若下不止加龍骨一兩腹痛甚加當歸二兩胡洽用附子一枚桂一兩人霍亂亦不吐痢但四支脉沉肉冷汗出渴者即差

厚朴湯治煩嘔腹脹

厚朴四兩炙桂二兩枳實五枚炙生薑三兩以水六升煮取二升分為三服

凡此湯四種是霍亂諸患皆治之不可不合也霍亂若心痛尤甚者此為挾毒兼用中惡方治之

附方

孫真人治霍亂

以胡椒三四十粒以飲吞之

斗門方治霍亂

用黃杉木劈開作片一握以水濃煎一盞服之

外臺祕要治霍亂煩躁

燒亂髮如鷄子大鹽湯三升和服之不吐再服

又方治霍亂腹痛吐痢

取桃葉三升切以水五升煮取一升三合分溫二服

梅師方治霍亂心痛利無汗

取梨葉枝一大握水二升煎取一升服



又方治霍亂後煩躁卧不安穩

葱白二十莖大棗二十枚以水三升煎取二升分服  
兵部手集救人霍亂頗有神效

漿水稍酸味者煎乾薑屑呬之夏月腹肚不調煎呬  
之差

孫用和治大瀉霍亂不止

附子一枚重七錢炮去皮臍為末每服四錢水兩盞  
鹽半錢煎取一盞溫服立止集效方治吐瀉不止或

致轉筋四肢發厥虛風不省人事服此四肢漸暖神識便省

回陽散天南星為末每服三錢入京棗三枚水一盞半同煎至八分溫服未省再服聖惠方治霍亂轉筋垂死

敗蒲席一握細切漿水一盞煮汁溫溫頓服

又方治肝虛轉筋

用赤蓼莖葉切三合水一盞酒三合煎至四合去滓

溫分二服

又方治肝風虛轉筋入腹

以鹽半斤水煮少時熱漬之佳

孫尚藥治脚轉筋攣急者

松節一兩細剉如米粒乳香一錢右件藥用銀石器  
內慢火炒令焦只留三分性出火毒研細每服一錢  
至二錢熱木瓜酒調下應時筋病皆治之

古今錄驗方治霍亂轉筋

取蓼一手把去兩頭以水二升半煮取一升半頓服之

治傷寒時氣溫病方第十三

治傷寒及時氣溫病及頭痛壯熱脉大始得一日方須取青朮根葉合搗三升許和之真丹一兩水一升合煮絞取汁頓服之得吐便差若重一升盡服厚覆取汗差

又方小蒜一升搗取汁三合頓服之不過再作便差

又方烏梅二七枚鹽五合以水三升煮取一升去滓頓服之

又方取生杼木削去黑皮細切裏白一升以水二升五合煎去滓一服八合三服差

又方取木丸子二七枚以水五升按之令熟去滓盡服汁當吐下愈

又方鷄子一枚著冷水半升攪與和乃復煮三升水極令沸以向所和水投湯中急攪令相得適寒溫頓服

取汗

又方以真丹塗身令遍面向火坐冷汗出差

又方取生蘘荷根葉合搗絞取汁服三四升

又方取乾艾三斤以水一斗煮取一升去滓頓服取汗

又方鹽一升食之以湯送之腹中當絞吐便覆取汗便

差

又方取比輪錢一百五十七枚以水一斗煮取七升服

汁盡之須臾復以五升水更煮令得一升以水二升

投中合令得三升出錢飲汁當吐毒出也

又方取猪膏如彈丸者溫服之日三服三日九服

又方烏梅三十枚去核以豉一升苦酒三升煮取一升  
半去滓頓服

又傷寒有數種人不能別令一藥盡治之者若初覺頭  
痛肉熱脉洪起一二日便作葱豉湯用葱白一虎口  
豉一升以水三升煮取一升頓服取汗不汗復更作  
加葛根二兩升麻三兩五升水煎取二升分再服必

得汗若不汗更加麻黃二兩又用蔥湯研米二合水  
一升煮之少時下鹽豉後內蔥白四物令火煎取三  
升分服取汗也

又方豉一升小男溺三升煎取一升分為再服取汗  
又方葛根四兩水一斗煎取三升乃內豉一升煎取升  
半一服搗生葛汁服一二升亦為佳也

若汗出不歇已三四日胃中惡欲令吐者

豉三升水七升煮取二升半去滓內蜜一兩又煮三



沸頓服安卧當得吐不差更服取差秘法傳於子孫也

又方生地黃三斤細切水一斗煮取三升分三服亦可服藜蘆吐散及苦參龍膽散

若已五六日以上者

可多作青竹瀝少煎令減為數數飲之厚覆取汗

又方大黃黃連黃檗梔子各半兩水八升煮六七沸內豉一升葱白七莖煮取三升分服宜老少

又方苦參二兩黃芩二兩生地黃半斤水八升煮取一升分再服或吐下毒則愈

若已六七日熱極心下煩悶狂言見鬼欲起走

用乾茱萸三升水二升煮取一升後去滓寒溫服之得汗便愈此方恐不失必可用也秘之

又方大蚘一升破去以人溺煮令熟去滓服之直生絞汁及水煎之並善又絞糞汁飲數合至一二升謂之黃龍湯陳久者佳

又方取白犬從背破取血破之多多為佳當及熱以薄  
胸上冷乃去之此治垂死者活無白犬諸純色者亦  
可用之

又方取桐皮削去上黑者細擘之長斷令四寸一束以  
酒五合以水一升煮取一升去滓頓服之當吐下青  
黃汁數升即差

又方鷄子三枚芒硝方寸匕酒三合合攪散消盡服之  
又方黃連三兩黃檗黃芩各二兩梔子十四枚水六升

煎取二升分再服治煩嘔不得眠

治時氣行垂死破棺千金煮湯苦參一兩呋咀以酒二升半舊方用苦參酒煮令得一升半去滓適寒溫盡服之當間苦寒吐毒如溶膠便愈

又方大錢百文水一斗煮取八升內麝香當門子李子大末稍稍與飲至盡或汗或吐之

治溫毒發斑大疫難救黑膏生地黃半斤切碎好豉一升猪脂二斤合煎五六沸令至三分減一絞去滓末

雄黃麝香如大豆者內中攪和盡服之毒從皮中出  
即愈

又方用生蝦蟆正爾破腹去腸乃搗吞食之得五月五  
日乾者燒末亦佳矣

黑奴丸胡洽小品同一名水解丸又一方加小麥黑殼  
一兩名為麥奴丸支同此注

麻黃二兩大黃二兩黃芩一兩芒硝一兩釜底墨一  
兩竈突墨二兩梁上塵二兩搗蜜丸如彈丸新汲水

五合末一九頓服之若渴但與水須臾寒寒了汗出  
便解日移五尺不覺更服一九此治五六日胸中大  
熱口噤名為壞病不可醫治用此黑奴丸

又方大青四兩甘草膠各二兩豉八合以水一斗煮二  
物取三升半去滓內豉煮三沸去滓乃內膠分作四  
服盡又合此治得至七八日發汗不解及吐下大熱  
甚佳

又方大黃三兩甘草二兩麻黃二兩杏仁三十枚芒硝

五合黃芩一兩巴豆二十粒熬搗蜜丸和如大豆服  
三丸當利毒利不止米飲止之家人視病者亦可先  
服取利則不相染易也此丸亦可預合置

麻黃解肌一二日便服之

麻黃甘草升麻芍藥石膏各一兩杏仁三十枚貝齒  
三枚末之以水三升煮取一升頓服覆取汗出即愈  
便食豉粥補虛即宜也

又方麻黃二兩芩桂各一兩生薑三兩以水六升煮取

二升分為四服

亦可服葛根解肌湯葛根四兩芍藥二兩麻黃大青甘草黃芩石膏桂各一兩大棗四枚以水五升煮取二升半去滓分為三服微取汗

三日已上至七八日不解者可服小柴胡湯柴胡八兩人參甘草黃芩各三兩生薑八兩無者乾薑三兩半夏五兩湯洗之大棗十二枚水九升煮取二升半分為三服微覆取汗半日須臾便差若不好更作一劑



金匱要略卷二  
若有熱實得汗不解復滿痛煩躁欲謬語者可服大柴  
胡湯方柴胡半斤大黃二兩黃芩三兩芍藥二兩枳  
實十枚半夏五兩洗之生薑五兩大棗十二枚水一  
斗煮取四升當分為四服當微利也

此四方最第一急須者若幸可得藥便可不營之保無  
死憂諸小治為防以窮極耳若病失治及治不差十日  
已上皆名壞病唯應服大小鼈甲湯此方藥分兩乃少  
而種數多非備急家所辦故不載凡傷寒發汗皆不可

使流離過多一服得微汗汗絜便止未止粉之勿當風  
初得傷寒便身重腰背痛煩悶不已脉浮面赤斑斑如  
錦文喉咽痛或下痢或狂言欲走此名中陽毒五日可  
治過此死宜用此方

雄黃甘草升麻當歸椒桂各一分水五升煮取二升  
半分三服溫覆取汗服後不汗更作一劑

若身重背強蟄蟄如被打腹中痛心下強短氣嘔逆脣  
青面黑四肢冷脉沉細而緊數此名中陰毒五日可治

過此死用此方

甘草升麻各二分當歸椒各一分鱉甲一兩以水五升煮取二升半分三服溫覆取汗汗不出湯煮更作也

陰毒傷口鼻冷者乾薑桂各一分末溫酒三合服之當大熱差凡陰陽二毒不但初得便爾或一二日變作者皆以今藥治之得此病多死治熱病不解而下痢困篤欲死者服此

大青湯方大青四兩甘草三兩膠二兩豉八合赤石脂  
三兩以水一斗煮取三升分三服盡更作日夜兩劑  
愈

又方但以水五升豉一升梔子十四枚韭白一把煮取  
三升半分為三服

又方龍骨半斤搗碎以水一斗煮取五升使極冷稍稍  
飲其間或得汗即愈矣

又方黃連當歸各二兩乾薑一兩赤石脂二兩蜜丸如

梧子服二十九日三夜再

又方黃連二兩熟艾如鴨卵大以水二斗煮取一升頓服立止

天行諸痢悉主之黃連三兩黃檗當歸龍骨各二兩以水六升煮取二升去滓入蜜七合又火煎取一升半分為三服效

天行毒病挾熱腹痛下痢升麻甘草黃連當歸芍藥桂心黃檗各半兩以水三升煮取一升服之當良

天行四五日大下熱痢黃連黃檗各三兩龍骨三兩艾  
如鷄子大以水六升煮取二升分為二服忌食豬肉  
冷水

若下膿血不止者赤石脂一斤乾薑一兩粳米一升水  
七升煮米熟去滓服七合日三

又方赤石脂一斤乾薑二兩水五升煮取三升分二服  
若絞臍痛加當歸一兩芍藥二兩加水一升也

若大便秘閉令利者大黃四兩厚朴二兩枳實四枚以

水四升煮取一升二合分再服得通者止之

若十餘日不大便者服承氣丸大黃杏仁各二兩枳實  
一兩芒硝一合搗蜜和丸如彈丸和湯六七合服之  
未通更服

若下痢不能食者黃連一斤烏梅二十枚炙燥並得搗  
末蠟如棊子大蜜一升合於微火上令可丸丸如梧  
子大一服二九日三

若小腹滿不得小便者細末雌黃蜜和丸取如棊核大

內溺孔中令半寸亦以竹管注陰令痛朔之通

又方末滑石三兩葶藶子一合水二升煮取七合服

又方搗生葱傳小腹上參易之

治胸脇痞滿心塞氣急喘急方人參朮各一兩枳實二兩乾薑一兩搗蜜和丸一服一枚若嗽加括萋二兩吐加牡蠣二兩日夜服五六丸不愈更服

毒病攻喉咽腫痛方切當陸炙令熱以布藉喉以熨布

上冷復易



又方取真蘭茄瓜甲大內口中以牙小嚼汁以漬喉當微覺異為佳也

毒病後攻目方煮蜂巢以洗之日六七度佳

又方冷水漬青布以掩之

若生翳者燒豉二升粒末內管鼻中以吹之

治傷寒嘔不止方甘草一兩升麻半兩生薑三兩橘皮二兩水三升煮取二升頓服之愈

又方乾薑六分附子四分末以苦酒丸如梧子大一服

三九日三服

治傷寒哕不止方甘草三兩橘皮一斤水五升煮取三升分服日三取差

又方熟洗半夏末服之一錢一服

又方赤蘇一把水三升煮取二升稍稍飲

又方乾薑六分附子四分末苦酒丸如梧子大服三九日三服

比歲有病時行仍發瘡頭面及身須臾周匝狀如火瘡

皆戴白漿隨決隨生不即治劇者多死治得差後瘡癰  
紫黑彌歲方滅此惡毒之氣世人云永徽四年此瘡從  
西東流遍於海中煮葵菜以蒜齏啖之即止初患急食  
之少飯下菜亦得以建武中於南陽擊虜所得仍呼為  
虜瘡諸醫叅詳作治用之有效方

取好蜜通身上摩亦可以蜜煎升麻并數數食

又方以水濃煮升麻綿沾洗之苦酒漬彌好但痛難忍  
其餘治猶依傷寒法但每多作毒意防之用地黃黑膏

亦好

治時行病發黃方茵陳六兩黃二兩梔子十二枚以  
水一斗先煮茵陳取五升去滓內二物又煮取三升  
分四服亦可兼取黃疸中雜治法差

比歲又有虜黃病初唯覺四體沉沉不快須臾見眼中  
黃漸至面黃及舉身皆黃急令溺白紙紙即如髹染者  
此熱毒已入內急治之若初覺便作茈蒂赤豆散吹鼻  
中鼻中黃汁出數升者多差若已深應看其舌下兩邊

有白脉彌彌處蘆刀割破之紫血出數升亦歇然此須  
慣解剖者不解割忽傷亂舌下青脉血出不止便煞人  
方可燒紡軫鐵以灼此脉令焦兼瓜蒂雜巴豆搗為丸  
服之大小便亦去黃汁破灼已後禁諸雜食又云有依  
黃坐黃復須分別之方

切竹煮飲之如飲

又方搗生瓜根絞取汁飲一升至二三升

又方醋酒浸鷄子一宿吞其白數枚

又方竹葉切五升小麥七升石膏三兩末綿裹之以水  
一斗五升煮取七升一服一升盡喫即差也

又方生葛根汁二升好豉一升梔子三七枚茵陳切一  
升水五升煮取三升去滓內葛汁分為五服

又方金色脚鷄雌雞血在治如食法熟食宜飲汁令盡  
不過再作亦可下少鹽豉佳

治毒攻手足腫疼痛欲斷方用虎杖根剉煮適寒溫以  
漬足令踝上有尺許水止之

又方以稻穰灰汁漬足

又方酒煮苦參以漬足差

又方鹽豉及羊屎一升搗令熟以漬之

又方細剉黃蘗五斤以水三斗煮漬之亦治攻陰腫痛

又方作坎令深三尺少容兩足燒坎令熱以酒灌坎中

著屐踞坎中壅勿令泄

又方煮羊桃汁漬之雜少鹽豉尤好

又方煮馬矢若羊矢汁漬

又方猪膏和羊矢塗之亦佳

又方以牛肉裹腫處腫消痛止

又方搗常思草絞取汁以漬足

又方猪蹄一具合葱煮去滓內少鹽以漬之

毒病下部生瘡者燒鹽以深導之不過三

又方生漆塗之綿導之

又方大丸艾灸下部此謂窮無藥

又方取蚓三升以水五升得二升半盡服之



又方煮桃皮煎如粳以綿合導之

又方水中苧菜搗綿導之日五易差

又方櫟皮槲皮合煮汁如粘糖以導之又濃煮桃皮飲之最良

又方搗蛇莓汁服三合日三水漬烏梅令濃并內崖蜜數數飲

若病人齒無色舌上白或喜睡眠憤憤不知痛痒處或下痢急治下部不曉此者但攻其上不以下為意下部

生蟲蟲食其肛肛爛見五臟便死治之方

取雞子白內漆合攪還內穀中仰頭吞之當吐蟲則愈  
又方燒馬蹄作灰細末猪脂和塗綿以導下部日數度  
差

又方桃仁十五枚苦酒二升鹽一合煮取六合服之  
又方燒艾於管中薰之令煙入下部中少雜雄黃妙此  
方是溪溫故爾兼取彼治法

又有病蠱下不止者烏頭二兩女萎雲實各一兩桂二

分蜜丸如桐子水服五丸一日三服

治下部卒痛如鳥啄之方赤小豆大豆各一升合搗兩  
囊貯蒸之令熟更互坐即愈

此本在雜治中亦是傷寒毒氣所攻故凡治傷寒方甚多  
其有諸麻黃葛根桂枝柴胡青龍白虎四順四逆二十  
餘方並是至要者而藥難盡備且診候須明悲別所在  
撰大方中今唯載前四方尤是急須者耳其黃膏赤散  
在辟病條中預合初覺患便服之傷寒時行瘟疫三名

同一種耳而源本小異其冬月傷於寒或疾行力作汗  
出得風冷至夏發名為傷寒其冬月不甚寒多暖氣及  
西風使人骨節緩墮受病至春發名為時行其年歲中  
有癘氣兼挾鬼毒相注名為癘病如此診候並相似又  
貴勝雅言惣名傷寒世俗因號為時行道術符刻言五  
溫亦復殊大歸終止是共途也然自有陽明少陰陰毒  
陽毒為異耳少陰病例不發熱而腹滿下痢最難治也  
附方

必效方治天行一二日者麻黃一大兩去節以水四升  
煮去沫取二升去滓著米一匙及豉為稀粥取強一  
升先作熟湯浴淋頭百餘椀然後服粥厚覆取汗於  
夜最佳

梅師方治傷寒汗出不解已三四日胃中悶吐豉一升  
鹽一合以水四升煎取一升半分服當吐

聖惠方治傷寒四日已嘔吐更宜吐以苦參末酒下二  
錢得吐差

又方治時氣熱毒心神煩躁用藍澱半大匙以新汲水一盞服

又方治時氣頭痛不止用朴硝三兩搗羅為散生油調塗頂上

又方治時氣煩渴用生藕汁一中盞入生蜜一合令勻分二服

勝金方治時疾熱病狂言心躁苦參不限多少炒黃色為末每服二錢水一盞煎至八分溫服連煎三服有

汗無汗皆差

博濟方治陰陽二毒傷寒黑龍丹舶上硫黃一兩以柳木槌研三兩日巴豆一兩和殼記箇數用二升鐺子一口先安硫黃鋪鐺底次安巴豆又以硫黃蓋之醃醋半斤以來澆之蓋子蓋合令緊密更以濕紙周回固濟縫勿令透氣縫紙乾更以醋濕之文武火熬常著人守之候裏面巴豆作聲數已半為度急將鐺子離火便入臼中急搗令細再以少米醋并蒸餅少許再

搗令冷可丸如鷄頭大若是陰毒用椒四十九粒葱  
白二莖水一盞煎至六分服一丸陽毒用豆豉四十  
九粒葱白二莖水一盞同煎吞一丸不得嚼破

孫用和方治陽毒入胃下血頻疼痛不可忍鬱金五箇  
大者牛黃一皂莢子別細研二味同為散每服用醋  
漿水一盞同煎三沸溫服

孫兆口訣治陰毒傷寒手足逆冷脉息沉細頭疼腰重  
兼治陰毒欬逆等疾方



川烏頭乾薑等分為麤散炒令轉色放冷再搗為細散每一錢水一盞鹽一撮煎取半盞溫服

又方治陰勝隔陽傷寒其人必躁熱而不欲飲水者是也宜服霹靂散附子一枚燒為灰存性為末蜜水調下為一服而愈此逼散寒氣然後熱氣上行而汗出乃愈

聖惠方治陰毒傷寒四肢逆冷宜熨以吳茱萸一升酒和勻濕絹袋二隻貯蒸令極熱熨脚心候氣通暢勻

暖即停熨累驗

唐崔元亮療時疾發黃心狂煩熱悶不認人者取大括  
蕒一枚黃者以新汲水九合浸淘取汁下蜜半大合  
朴硝八分合攪令消盡分再服便差

外臺秘要治天行病四五日結胸滿痛壯熱身體熱苦  
參一兩剉以醋二升煮取一升二合盡飲之當吐即  
愈天行毒病非苦參醋藥不解及溫覆取汗愈

又方救急治天行後嘔逆不下食食入即出取羊肝如

食法作生淡食不過三度即止

又方以雞卵一枚煮三五沸出以水浸之外熟內熟則  
吞之良

聖惠方治時氣嘔逆不下食用半夏半兩湯浸洗七遍  
去滓生薑一兩同剉碎以水一大盞煎至六分去滓  
分二服不計時候溫服

深師方治傷寒病嘔不止半夏熟洗乾末之生薑湯服  
一錢匕

簡要濟衆治傷寒咳噫不止及噦逆不定

丁香一兩乾柿蒂一兩焙乾搗末人參煎湯下一錢無  
時服

外臺祕要治天行毒病衄鼻是熱毒血下數升者好墨  
末之雞子白丸如梧子用生地黃汁下一二十九如  
人行五里再服

又療傷寒已八九日至十餘日大煩渴熱勝而三焦有  
瘡蠱者多下或張口吐舌呵吁目爛口鼻生瘡吟語不

識人除熱毒止痢方

龍骨半斤碎以水一斗煮取四升沉之井底令冷服  
五合漸漸進之恣意飲尤宜老少

梅師方治熱病後下痢膿血不止不能食

白龍骨末米飲調方寸匕服

食療治傷寒熱毒下血羚羊角末服之即差又療疝氣  
聖惠方治傷寒狐惑毒蝕下部肛外如蠶痛痒不止雄  
黃半兩先用瓶子一箇口大者內入灰上如裝香火

將雄黃燒之候煙出當病處熏之

又方主傷寒下部生蠱瘡用烏梅肉三兩炒令燥杵為末煉蜜丸如梧桐子大以石榴根皮煎湯食前下十丸

外臺祕要方崔氏療傷寒手足疼欲脫取羊屎煮汁以濯之差止亦療時疾陰囊及莖熱腫亦可煮黃蘗等洗之

梅師方治傷寒發豌豆瘡未成膿研芒硝用猪膽和塗

上效

經驗後方治時疾發豌豆瘡及赤瘡子未透心煩狂躁  
氣喘妄語或見鬼神

龍腦一錢細研旋滴猪心血和丸如鷄頭肉大每服  
一丸紫草湯下少時心神便定得睡瘡復發透依常  
將息取安

藥性論云虎杖治大熱煩躁止渴利小便壓一切熱毒  
暑月和甘草煎色如琥珀可愛堪著嘗之甘美瓶置

井中令冷徹如水白甕器及銀器中貯似茶啜之時  
人呼為冷飲子又且尊於茗能破女子經候不通搗  
以酒浸常服有孕人勿服破血

治時氣病起諸勞復方第十四

凡得毒病愈後百日之內禁食猪犬羊肉并傷血及肥  
魚大臙乾魚則必大下痢下則不可復救又禁食麪食  
胡蒜韭薤生菜蝦鮓輩食此多致復發則難治又令到  
他年數發也



治篤病新起早勞及食飲多致欲死方

燒鰓甲服方寸匕

又方以水服胡粉少許

又方粉三升以煖水和服之厚覆取汗

又方乾蘇一把水五升煮取二升盡服之無乾者生亦

可用加生薑四兩豉一升

又方鼠矢兩頭尖者二七枚豉五合以水三升煎半頓服之可服溫覆取汗愈有麻子入內一升加水一升

彌良亦可內枳實葱白一虎口也

又方取伏雞子殼碎之熬令黃黑細末熱湯服一合溫覆取汗

又方大黃麻黃各二兩梔子仁十四枚豉一升水五升煮取二升分再服當小汗及下痢

又方濃煮甘草服之蘆根亦佳

食多而發復方燒飯篩末服方寸匕良

治交接勞復陰卵腫或縮入腹腹中絞痛或便絕方

燒婦人月經衣服方寸匕

又方取狔子一枚撞之三十六放於戶中遂使喘極乃刺脇下取血一升酒一升合和飲之若卒無者但服血慎勿使冷應用狔狔

又方取所交接婦人衣覆男子上一食久沽之

又方取狔狔脰及血和酒飲之差

又方刮青竹茹二升以水三升煮令五六沸然後絞去滓以竹茹湯溫服之此方亦通治勞復

又方礬石一分硝三分末以大麥粥清可方寸匕三服  
熱毒隨大小便出

又方取蓼子一大把水按取汁飲一升乾者濃煎取汁服  
之葱頭搗以苦酒和服亦佳

又方蚯蚓數升絞取汁服之良

若差後病男接女病女接男安者陰易病者發復復者  
亦必死

卒陰易病男女溫病差後雖數十日血脉未和尚有熱

毒與之交接者即得病曰陰易殺人甚於時行宜急治之

治人身體重小腹急熱上腫胸頭重不能舉眼中生眦  
膝脛拘急欲死方

取婦人禪親陰上者割取燒末服方寸匕日三小便  
即利而陰微腫者此當愈得童女禪亦良若女病亦  
可用男禪

又方鼠矢兩頭尖者二七枚藍一把水五升煮取二升

盡服之溫覆取汗

又方蚯蚓二十四枚水一斗煮取三升一服仍取汗並  
良

又方末乾薑四兩湯和頓服溫覆取汗得解止

又方男初覺便灸陰三七壯若已盡甚至百壯即愈眼  
無妨陰道瘡復常

兩男兩女並不自相易則易之為名陰陽交換之謂也  
凡欲病人不復取女人手足爪二十枚又取女中下裳

帶一尺燒灰以酒若米飲服之

大病差後小勞便鼻衄方

左顧牡蠣十分石膏五分搗末酒服方寸匕日三四

亦可蜜丸服如梧子大服之

大病差後多虛汗及眼中流汗方

牡仲牡蠣分等暮卧水服五匕則停不止更作

又方甘草二兩石膏二兩搗末以漿服方寸匕日二服

差

又方龍骨牡蠣麻黃根末雜粉以粉身良

又差復虛煩不得眠眼中痛疼懊懣豉七合烏梅十四枚水四升先煮梅取二升半內豉取一升半分再服無烏梅用梔子十四枚亦得

又方黃連四兩芍藥二兩黃芩一兩膠三小挺水六升煮取三升分三服亦可內乳子黃二枚

又方千里流水一石揚之萬度二斗半半夏二兩洗之秫米一斗茯苓四兩合煮得五升分五服



附方

梅師方治傷寒差後交接發動困欲死眼不開不能語  
方

梔子三十枚水三升煎取一升服

治瘴氣疫癘溫毒諸方第十五

辟瘟疫藥干散

大麻仁栝子仁乾薑細辛各一兩附子半兩炮搗篩正  
旦以井華水舉家各服方寸匕疫極則三服日一服

老君神明散

白朮一兩附子三兩烏頭四兩桔梗二兩半細辛一兩  
搗篩正旦服一錢匕一家合藥則一里無病此帶行所  
遇病氣皆消若他人有得病者便溫酒服之方寸匕  
亦得病已四日以水三升煮散服一升覆取汗出也  
赤散方

牡丹五分阜莢五分炙之細辛乾薑附子各三分肉  
桂二分真珠四分躑躅四分搗篩為散初覺頭強邑

邑便以少許內鼻中吸之取吐溫酒服方寸匕覆眠得汗即差晨夜行及視病亦宜少許以內粉粉身佳牛馬疫以一匕著舌下溺灌日三四度甚妙也

度瘴散辟山瘴惡氣若有黑霧鬱勃及西南溫風皆為疫癘之候方

麻黃椒各五分烏頭三分細辛朮防風桔梗桂乾薑各一分搗篩平旦酒服一錢匕辟毒諸惡氣冒霧行尤宜服之

太乙流金方

雄黃三兩雌黃二兩礬石鬼箭各一兩半殺羊角二兩搗為散三角絳囊貯一兩帶心前并門戶上月旦青布裹一刀圭中庭燒溫病人亦燒燠之即差

辟天行疫癘雄黃丹砂巴豆礬石附子乾薑分等搗蜜丸平旦向日吞之一丸如胡麻大九日止令無病常用辟溫病散方

真珠肉桂各一分貝母三分熬之雞子白熬令黃黑

三分搗篩歲旦服方寸匕若歲中多病可月月朔望服之有病即愈病人服者當可大效

虎頭殺鬼方

虎頭骨五兩朱砂雄黃雌黃各一兩半鬼臼阜莢蕪荑各一兩搗篩以蠟蜜和如彈丸絳囊貯繫臂男左女右家中懸屋四角月朔望夜半中庭燒一九一方有菖蒲藜蘆無虎頭鬼臼阜莢作散帶之

趙泉黃膏方

大黃附子細辛乾薑椒桂各一兩巴豆八十枚去心  
皮搗細苦酒漬之宿臘月猪膏二斤煎三上三下絞  
去滓蜜器貯之初覺勃色便熟如梧子大一丸不差  
又服亦可火炙以摩身體數百遍佳并治賊風走遊  
皮膚並良可預合之便服即愈也

單行方術西南社中栢東南枝取暴乾末服方寸匕立差  
又方正月上寅日搗女青屑三角絳囊貯繫戶上帳前  
大吉

又方馬蹄木搗屑二兩絳囊帶之男左女右

又方正月朔旦及七月吞麻子小豆各二七枚又各二  
七枚投井中又以附子二枚小豆七枚令女子投井中  
又方冬至日取雄赤雞作腊至立春煮食盡勿分他人  
二月一日取東行桑根大如指懸門戶上人人帶之  
又方埋鵲於園前

斷瘟病令不相染著斷髮仍使長七寸盜著病人臥席下  
又方以繩度所住戶中壁屈繩結之

又方密以艾灸病人床四角各一壯不得令知之佳也  
又方取小豆新布囊貯之置井中三日出舉家男服十  
枚女服二十枚

又方桃木中蟲矢末服方寸七

又方鮑魚頭燒三指撮小豆七枚合末服之女用豆二  
七枚

又方熬豉雜土酒漬常將服之

又方以鯽魚密致卧下勿令知之



又方栢子仁細辛糴米乾薑三分附子一分末酒服方寸七日服三服十日

又方用麥蘖服糴米乾薑又云麻子仁可作三種服之附方

外臺祕要辟瘟方

取上等朱砂一兩細研白蜜和丸如麻子大常以太歲日平旦一家大小勿食諸物面向東立各吞三七丸永無疾疫



肘後備急方卷二